

**PUO EA MOTLOTLEHI LETSIE III – KETEKELO EA LILEMO TSE MASHOME
A MAHLANO A METSO E MENE (54) EA BOIPUSO BA LESOTHO**

SECHABA SA HESO.

KEA LE LUMELISA LETSATSING LENA LA BOHLOKOA NALANENG EA NAHA EA RONA EA LESOTHO. JOALO KA HA LE TSEBA, LETSATSI LENA LA LA NNE MPHALANE (**4TH OCTOBER**) KE LETSATSI LEO LESOTHO LE ILENG LA FUMANA BOIPUSO KA LONA HO TSOA HO MANYSEMANE, KA SELEMO SA 1966.

KAJENO KE LILEMO TSE MASHOME A MAHLANO A METSO E MENE (54) RE IPUSA. RE LOKELA KE HONA HO HETLA MORAO RE SHEBE LE HO HLAHLOBA TSELA EO RE E TSAMAILENG NAKONG ENA EA BOIPUSO BA RONA. BOHLE LE TLA LUMELLANA LE NNA HORE RURI RE TSAMAILE LEETO LE BOIMA, LA MEEPA LE METHEO, LE RE TSAMASITSENG HARA LIKHOHLO LE LIKHOHLOANA. LE HA HO LE JOALO, RE BONE KHATELO-

PELE E FIHLETSOENG LIKAROLONG TSE LING TSA MORUO. RE BONE KANETSO EA LITSELA KAROLONG E KHOLO EA NAHA. RA BONA BOITEKO MABAPI LE HO ATAMETSA LITŠEBELETSO SECHABENG, JOALO KA MOTLAKASE, METSI, MARANG-RANG A LIKHOKAHANYO, ESITA LE LITSI TSA BOPHELO LE TSONA LIKOLO. EMPA, BOHLE RE NTSE RE BONA HORE TSELA ESALE TELELE KAPELE HO RONA LETŠOLONG LA HO FIBLISA LITŠEBELETSO LIKAROLONG TSOHLE TSA NAHA ENA EA MOSHOESHOE.

KA LEHLAKORENG LA PUSO, REA TSEBA HORE RE TSAMAILE TSELA E THATA KA HO FETISISA. HAESALE SECHABA SE LLA KA TLHOKAHALO EA BOTSITSO NAKONG ENA EA LILEMO TSE MASHOME A MAHLANO A METSO E MENE RE IPUSA. KA BOMALIMABE, MAEMO ANA A FOKOLISITSE LITŠIA TSA RONA TSA PUSO, ESITA LE ONA MORUO. LEHA RE TSAMAILE TSELA EO E BOIMA, RE NTSE RE LOKELA, RE LE SECHABA SA BALUMELI, HO LEBOHA MORENA MOLIMO HA A NTSE A RE BOLOKILE RE NTSE RE LE SECHABA SA BASOTHO SE NANG LE NAHA EA SONA, LE MEETLO LE MEKHOA EO RE NTSE RE ITŠOARELLETSE KA EONA.

BASOTHO BA HESO,

LETLA HOPOLA HORE LILEMONG TSE 'NE (4) TSE FETILENG, HA RE KETEKELA LILEMO TSE MASHOME A MAHLANO A BOIPUSO, MOKETENG OA RONA OA **“JUBILE”**, RE KETEKILE TLAS'A MOHOO O RENG: **“KAOFELA RE CHABANA SA KHOMO”**. KA POLELO ENA, RE NE RE IKHOPOTSA BONNGOE BA RONA RE LE SECHABA SA BASOTHO.

HAPE, POLELO ENA, E NE E RE HOPOTSA HORE RE LE BASOTHO RE BANA BA MONNA BA AROLELANANG HLOOANA EA TSIE, 'ME RE TLAMEHA HO UTLOELANA BOHLOKO KA LINAKO TSOHLE. LE TLA HOPOLA HAPE HORE RE ILE RA ETSA BOITLAMO BA HORE LILEMONG TSE TLANG TSE MASHOME A MAHLANO TSA BOIPUSO, RE TLA BONA HORE LESOTHO LEA NTLAFALA MOLEMONG OA SECHABA SOHLE SA BASOTHO.

KA HONA, KE IPILE TSA HO LONA BOOHLE HORE HA RE KETEKAL
LETSATSI LENA LA BOHLOKOA, RE TSOSOLOTSENG KANO LE BOITLAMO
BOO BA RONA HO SEBELE TSA LESOTHO, KA 'NETE EOHLE, LE KA
BOTŠEPEHI, E LE HO MATLAFATSA MORUO LE BOTSITSO BA NAHA, RE
TLE RE TSEBE HO LOANTŠA TLALA, TLHOBOLO LE BOFUMA.

LEETO LENA, LEO RE LE TSAMAILENG, LA LITSIETSI LE TŠOTLEHO, LE
ILE LA RE RUTA HORE TAKATSO EA RONA EA HO TLISA BOTSITSO LE HO
HOLISA MORUO OA NAHA, RE KA E FIHLELA HA RE KA KENA MORERONG
OA HO HLAHLOBA LE HO HLOPHA BOCHA LITŠIEA TSA PUSO EA RONA.
KE NTSE KE KHOTHALA HA KE BONA KHATELO-PELE MOSEBETSING OA
SETSI SE SEBETSANANG LE TLHOPHO-BOCHA (**NATIONAL REFORMS
AUTHORITY**), JOALO KA HO THEHA BOSEBELETSI (**SECRETARIAT**) BO
TLA BA THUSA HO PHETHAHATSA LIQETO TSA SECHABA.

KE BOIPILETSO BA KA BO KHETHEHILENG HO BOOHLE BA NANG LE
KOBO EA BOHALI TABENG TSENA TSA TLHOPHO BOCHA HO ETSA SOHLE

SE MATLENG A BONA HORE MOSEBETSI ONA O ETSOA KA POTLAKO, MAKHETHE LE HLOKOLOSI, MOLEMONG OA HO MATLAFATSA LITŠIEA TSA PUSO, LE MOLEMONG OA KHOTSO, BOTSITSO LE KHOLO EA MORUO.

BO MME LE BO NTATE LE LONA BANA,

LEHA RE TŠOAEA KA THABO LETSATSI LENA LA BOIPUSO, RE MASOABI HORE MONONGOAHA RE KETEKAKA TLAS'A MAEMO A BOLUTU A TSITSIPANO, A SA TLOAELEHANG, KA LEBAKA LA SEOA SA COVID-19 SE APARETSENG LEFATŠE KA KAKARETSO. HO FIHLA HA HAJOALE, RE BILE LE BATHO BA HLAHLOBETSOENG TŠOAETSO BA 19,169, 'ME BA FUMANOENG BA NA LE TŠOAETSO BA 1,680. HO BAO BA FUMANOENG BA ENA LE TŠOAETSO, KE BA 926 BA ILENG BA HLAHLOHELOA, 'ME RE LEBOHA RAMASELI KA HONA.

LEHA HO LE JOALO, KA MASOABI A MAHOLO BA MASHOME A MARARO A METSO E ROBONG (39) BA ILE BA HLOLOA KE NTOA MME BA SE BA RE SIILE LEFATŠENG LE KA KOANO. RE BA HOPOLA KA HLOMPHO BARATUOA BAO BA RONA. RE KOPELA MALAPA A BO BONA MATŠELISO A SEBELE A TSOANG HO MORENA MOLIMO. KE THAPELO EA RONA HORE BA MPE BA FUMANE PHOMOLO E SA FELENG MOHAUNG OA MOLIMO.

NTUMELLENG SECHABA SA HESO HORE, HA KE LE MOTHATING ONA, KE LEBOHE LINGAKA LE BAKI LE BOHLE BA RE THUSANG HO LOANTŠA KHOLUMO-LUMO ENA. KE LEBOHA LE LONA SECHABA KA KAKARETSO KA HO IKOBELA MELAO LE MALAOANA EA 'MUSO, LE LIPEHELO TSA MOKHATLO OA LEFATŠE OA LITABA TSA BOPHELO **(W.H.O)** TAOLONG EA SEOA SENA.

HA RE HOPOLENG HORE SEOA SENA SE KOTSI, EBILE SE NTSE SE ATA. KA HONA, TSOELANG PELE HO IPABALLA KA HO HLATSOA MATSOHO

KHAFETSA KA METSI A PHALLANG LE SESEPA; KA HO ROALA LIKOAHELA MOLOMO LE LINKO (MASKS) KA LINAKO TSOHLE; LE HO BOLOKA SEBAKA SE LEKANENG (SOCIAL DISTANCING) LIPAKENG TSA LONA.

MATHATA A TLISITSOENG KE SEOA SENA SA COVID-19, A RE RUTILE BOHLOKOA BA HO IKETSETSA, HAHOLOHOLO HO ITLHAHISETSA LIJO RE LE SECHABA LE NAHA. MOSOTHO OA KHALE O NE A OPILE KHOMO LENAHA HA ARE **“MPHE-MPHE E EA LAPISA, MOTHO O KHONOA KE SA NTLO EA HAE MOLEKANE.”** TLASA BOIKARABELLO BA KA KE LE MOLULA-QHOOA OA PHEPO E NEPAHETSENG OA MOKHATLO OA LINAHA TSE KOPANENG TSA AFRIKA **(AU CHAMPION ON NUTRITION)** LE MOEMELI EA KHETHEHILENG OA PHEPO E NEPAHETSENG OA MOKHATLO OA LIJO LE TEMO OA MACHABA A KOPANENG **(F.A.O. SPECIAL AMBASSADOR FOR NUTRITION)** KE SE KE IPILETSA HO LIHOAI LE SECHABA KA KAKARETSE HORE, HA LIPULA LI FIHLA, RE POTLAKELING MASIMONG LE LIRAPENG TSA RONA HO KENYA LIPEO MOBUNG, LE TSEBE HO HLAHISETSA MALAPA A LONA LE NAHA EA RONA LIJO TSE THIBANG TLALA LE TSE HAHANG ‘MELE. HO TOTOBETSE HORE

TLALA KA BO EONA FELA E KA METSA SECHABA SENA SA MOSHOESHOE
LE HO FETA COVID-19, HA HO SA NKUOE MEHATO E LOKELANG HO E
LOANTŠA.

BASOTHO BA HESO,

E LE HO TŠOAEA LETSATSI LENA LA BOIPUSO, LEO KAJENO LE
OETSENG LETSATSING LA SONTAHA, 'MUSO O IKELELITSE HORE
SEHLOHLOLO SA LETSATSI LA BOIPUSO SELEMONG SENA, SE TLA BA
LEKHOTLENG LA MATHOMO LA SEMONKONG (SEMONKONG URBAN
COUNCIL) KA LABOHLANO LA LA 9 MPHALANE. KETEKELO EA
MONONGOAHA E TLA BA KA HO HLOEKISA TIKOLOHO EO RE PHELANG
HO EONA. SENA E NTSE E LE NTŠETSO-PELE EA LETŠOLO LA HO
HLOEKISA LESOTHO E LENG LETŠOLO LE ILENG LA THAKHOLOA KE
MOHLOMPHEHI TONA-KHOLO KA LABOHLANO LA LA 18 LOETSE.

HAELE LITEREKENG TSE LING, HO TLA KETEKOA KA MOKHOA O
TŠOANANG, MOO MATONA A 'MUSO A TLA ETELLA PELE TŠEBETSO ENA
EA HO HLOEKISA TIKOLOHO.

KE QETELLA POLELO ENA KA HO LE LAKALETSA BOOHLE MOO LE LENG
TENG, SECHABA SA THESELE, BOPHELO BO BOTLE, MAHLOHONOLO LE
KATLEHO HA RE KETEKA LETSATSI LENA LA BOIPUSO BA LESOTHO –
LEFATŠE LA BO NTAT'A RONA!.

MOLIMO O BOLOKE LESOTHO LE BASOTHO

KHOTSO! PULA! NALA!